

四庫全書

集部

欽定四庫全書

集部

西巖集卷十九

詳校官中書臣李彤

侍讀臣孫球覆勘

膳錄監生臣孫藩

膳錄貢生臣王兆泰

欽定四庫全書

西巖集卷九

元 張之翰 撰

五言絕句

題田書史潤之馴鶴圖

蒼公以為朋青士以為友如何九臯心却食一女手
人引鶴踟躕鶴伴人幽獨深情兩無言松風亂修竹
娟娟掌中芝所得能幾何蕭然此幽境政自無網羅
生平萬里姿取馴固堪憐勿謂便不飛一飛當冲天

七言絕句

題太原賀氏雙桂樓

月中僂樹影婆娑
注意春風兩玉柯
比盡世間誰得似
實家差少鄰家多

簿書衮衮覓封侯
文筆區區委下流
底事君家不知變
尚將雙桂揭高樓

海棠

獨倚東風奈困何
能紅能白不須多
只渠顏色誰堪比

更恨無香亦太過

己丑清明郊外遙祭四首

淮南已過六改火燕下又經三禁煙
趙武陵邊是先隴
一回南望一淒然

年年忙裏過芳菲今歲清明試袂衣
枝上幽禽作何喜
勸人沽酒不容歸

桃李當時手自栽故園春早已花開
白頭親舊應相語
有底功名又不來

寵不曾求辱豈期世間何事苦相隨落花池閣香風底
才到醺酣總不知

送春九絕

腸斷春光欲盡時慙慙辨作送春詩風軒正自無新句
幾點楊花落硯池

蜚廉連日卷黃埃紅紫紛紛委綠苔蝴蝶不知春事了
有時猶自傍人來

青春背我去無蹤忙似飛雲疾似風試問多情雙燕子

來時曾遇夕陽中

風風雨雨妬年芳九十韶華夢一場只道春歸無覓處
滿畦流水菜花香

薄官燕都五遇春年年此際別東君情懷不似今朝惡
多少朱門鎖夕曛

睡足槐牕日影遲心清事簡應酬稀癡童未用催翁起
卧看簾間乳燕飛

唱徹新詞第幾篇留春不住獨淒然鬢毛禁得愁多少

落絮飛花又一年

杜宇聲中首重搔
侵尋老境漸難逃
青青不逐年華改
只有西山萬丈高

天上金烏不暫閒
人間節序自循環
玉堂有俸清如許
自買香醪一破顏

方塘頗倦遊
以此壯之

纔渡清溪懶着鞭
白雲嶺上莫留連
與君馳下陂陀去
一簇人家是玉泉

題陳取新外郎淨香亭五絕

四面陰森碧玉椽幽香細細淨娟娟從今不信閑花草
得到風吹雨洗邊

種德堂東一草亭主人新以淨香名有心為作亭中記
却恨蘭泉夢不成

工部遺篇屬吏曹益津老手重揮毫客來莫作茅亭看
能與東臺勢並高

先生無恙時常命僕作東臺圖詩有
祇因千頃膏腴地渾與陳家種德來

之語東臺乃祖
立遺愛碣之處

退食歸來坐夕曛竹香偏向淨中聞人家亭院花如錦
有幾存心到此君

實家仙桂謝家蘭注意春風次第看祇恐淨香亭子上
可人不獨碧琅玕

武勝軍江帥聯香二首

風捲邊聲入夕笳雪晴高宴總戎家酒醒為覓聯香句
半在梅花半竹花

將壇奕葉有餘芳疎竹寒梅盡著行料得亭中主人意

春風長要一般香

驪山溫泉

鞍馬西來恰入秦
滿身都是驛途塵
解衣貪浴方池水
忘却題詩諷太真

地氣蒸騰火氣燃
山間是處有湯泉
一般洗滌人生垢
不似華清受汚篇

山行聞松香

山氣昏昏水氣涼
入雲細路遠羊腸
歸鞍休道無佳況

一道松華撲鼻香

十二月二十有二日梁山軍捷至喜而作此

入川懷抱未曾開堆案文書苦自裁莫訝今朝忙喚酒

梁山新報捷音來

驛亭一騎捷書馳正及園亭未散時為向西南諸柵道
從今消得幾熊羆

溪行舟中

青山曲曲水重重百步難為百里中莫訝今朝行不得

鷓鴣聲裏打頭風

歸過馬道讀梁貢父郎中見和之什復用韻

嘗盡西來萬阻艱馬頭何日不青山歸囊半是川行藁
猶恨無題到劍關

贈徐明慧道士

出無知己好還家休走東南天一涯留取一雙明慧眼
他年應召辨姦邪

雨後睡起二首

連朝苦雨不再作
破暑好風才一逢
正向晴牕覓新句
淡雲忽起兩三峯

飛蠅惱夢逐未去
野鶴盤空招不來
此際清懷誰會得
夕陽倚杖立蒼苔

轎中假寐

官事昏昏半醉癡
肩輿揺兀日斜時
春風一覺荒田夢
行到前村却不知

寄東州諸君二首

偶因王事得遲留
儘著新詩紀勝遊
兩袖只今無別物
滿携東海入同州

鵲華雲盡碧參差
落日齊州道上時
白鳥飛來不飛去
向人有意聽新詩

題德公夢東坡卷四首

驂鸞騎鶴海天東
來現枯禪假寐中
二百年來猶畫像
當時同輩枉相攻

髫年曾夢讀蘇碑
覺後茫然費所思
却恨西山老禪伯

相逢無紙寫新詩

千古聲華塞八區夢中有語亦相符黃衣只說僧家了
不道斯文再振無

此圖初自敏公傳今日看來不偶然同姓上人辭世去
要君相繼遇坡僊

弁陽圖

嘗讀徐陵孝義碑蒼蒼高下一何奇畫圖忽洗黃塵眼
便是烏程卧看時

渲馬圖

一脉清流赴叻深冷光搖動絡頭金洗餘却入天閑去
誰會超然萬里心

盤馬圖二首

盤馬圖如畫馬圖小奚奴敵老奚奴是中若有龍駒在
數尺長竿套得無

一馬纔驚萬馬奔疾風吹散半川雲老髯果得防閑計
何處弓刀敢亂羣

題致樂堂

喜氣懽聲自一堂
白頭親到彩衣郎
壁間且莫糊塗了
大字看書孝行章

花有清香竹有陰
春風長在北堂深
細看慈母忘憂處
便是賢郎致樂心

歸至鎮國寺嗣宗以酒相勞四絕

煙霞滿面足驚猜
恰自霜巖頂上來
渠若問餘休說似
一尊遙為錦屏開

西山最好是秋深幾處重陽負此心眼界今年多少潤
千峯頂上一登臨

山行全不覺艱辛白石清泉儘可人不着一杯三嚥下
幾時融作滿懷春

收拾秋光入兔毫歸途殘照下林皋青旗解喚遊山客
斜捲西風五丈高

闕題

子能以孝醫母疾雲間雙明一旦開休道誠心無感召

舉禽飛下九天來

一家盡敬寧非佛
羣鵲來祥却是仙
仙佛悠悠無處問
錦囊詩卷至今傳

和改元韻

隔年一雨不曾晴
要洗妖氛四海清
古有三元今又異
元朝元日改元貞

題趙樊川日本紀行詩卷

公弼御史以樊川先生日本紀行詩見示三

復之餘使人心移神動如親在其洪濤絕島
中然叙事之工寫物之妙皆從大手中來苟
非名節素重忠義不屈其於使遠方歷殊俗
將危疑倥傯之不暇又安能出此語耶故書
三絕句於後

絕影開船入大洋筆頭嶮處盡難忘聖皇若問東隅事
祇此鋪陳是奏章

行盡東南萬里船歸來西北九重天不須更問公名節

看取唐僧密示篇

詩筆清雄樂府工篇篇猶帶島夷風不知他日樊川集
當置分門第幾中

題日者吳月堂卷後

遊遍吳中與越中百錢簾底自從容可憐一片三山月
不與南朝照吉凶

讀嬾菴梅詠且以梅見許久而不至五絕徵
之

與花擬結歲寒緣
見了還休祇自憐
怪底夜來香入夢
嬾菴詩句在題邊

山礬太鄙水仙臞
香影端能盡得無
若論孤清相似處
西巖未必讓西湖

寒梅只傍矮牕栽
等待春風次第開
昨日長明燈下坐
暗香先已逐人來

客中無物慰清饒
自乞花枝不是貪
方丈主人如見贈
直携春色到淮南

生平幾費愛梅詩
慰眼何曾見一枝
說向西禪散花手
古瓶溫水待多時

嬾菴見和復次前韻五首

不了塵中未了緣
區區形影亦相憐
自從叅透空花句
無夢羅浮曉月邊

待道臞來本不臞
若言無後豈能無
直除砍盡孤山樹
不見風光祇見湖

世外優曇未易栽
山間何處不梅開
此身便道非清淨

未肯輕拈一葉來

見花如渴復如饒宜著旁人道老貪不信真成被渠惱
仰天大笑向西南

信手拈來總是詩寧無冷蘂與疎枝若從枯淡中邊看
却是香消影滅時

嬾菴以絕句惠雪梅與水仙數枝依來韻五首
水邊風度月中英併付東樓照眼明可是天人解相戲
兩般花樣一般清

老師本是釋中英心已全空性已明一串驪珠二十八
尚能妝點兩花清

欲喚湘英與素英愛渠却恐太分明重重簾幙春風底
有口難言此味清

天香花萼國香英要似蘇黃曾發明不把風流禪說破
筆頭能有幾多清

玉作中單雪作英花中太白與淵明對花不是相過譽
何物人間有許清

嬾菴見和復次前韻五首

此花豈止百花英中有波光與月明
落盡眼前脂粉氣
世人猶未識真清

閱盡千葩與萬英性中自有本來明
恰如風裏浮雲過
到了何曾翳太清

廣平鐵石世間英山谷人才表裏明
數首新詩一篇賦
不知曾累二公清

幸有熏香與摘英花神却又忌聰明
明朝捲地東風惡

祇恐無人更問清

筆頭造化奪春英此理如今幾箇明一笑回頭都不問
胸中水鏡自然清

闕題

天矯柔枝幾許長春光老盡却芬芳
謫仙果識南薰曲肯道梨花白雪香

五月見石榴開

山光水色照樓臺正恨無花眼底來
可是東君專節物

臨風一樹石榴開

讀陳節齋詩刻

心遠亭高樹拂雲繡衣一去幾經春
壁間好護題詩石
再見如公有幾人

不見當年老節齋傷心遺蹟半蒼苔
讀餘風起庭前樹
猶似英靈到此來

思承索二色菊詩同郭伯周賦

半黃半白足驚猜都是花神巧剪裁
正色似憐無巨眼

一花剛作兩般開

白應素商黃應金本來各色却相侵而今花樣多如此
有幾同根不異心

三月晦日

雪帽風裘出帝京與春同到濟南城明朝春又堂堂去
剝約飛花與送行

日長人寂簿書稀擬賦春歸第二詩可是東風尚纖巧
亂飄飛絮冪游絲

題泰山僧連翠樓四首

底事山僧要放回小樓正對岱宗開索題羞道無新句

恰向天門直上來

是日余
下泰山

讀罷新詩更看山豁然胸次亦高寒不知詩興添多少

一片雲煙落筆端

老僧日日與誰隣半是煙霏半是雲好景且休都占盡

他時杖履要平分

雪頂霜眉骨相癯生平一意學空虛誰知事事消磨際

却被青山染著渠

密州喜雨詩

走遍諸州盡旱乾
恰從東武欲西還
片雲忽作飛來雨
道著隨車亦厚顏

昨日扶筇上北臺
青山隱隱隔塵埃
我知一雨非無意
洗出雙尖馬耳來

夢禱雩泉雨便飛
覺來擬欲答神私
十年儘有蘇文在
祇恐泉神不要詩

出東武馬上得二絕

殘照斜明馬耳山斷雲直接穆陵關據鞍未敢輕題詠
曾到坡公筆硯間

林煙漠漠水彎彎晚霽村虛畫障間
一雙白鳥點青山

泥水邑南見婦耘田者

十畝山田兩婦鋤午天如火汗如珠
從今縱有閑詩句且莫輕題倦繡圖

元氏中秋不見月呈敬齋

黃卷青燈記昔游回頭一十六年秋
瀟瀟不是玄都雨
剩為先生一月留

甲申元日漫書

畏途南北苦忽忽千里家山在夢中
誰把閑愁忽吹散
覺來門外有東風

形容鬢髮年年改門帖桃符處處新
休道揚州不留客
客中三度見新春

辯囚致雨元稱善嫉惡如風亦自賢今日興來俱莫問
且尋幽句向梅邊

泥中明月幾時有山上白雲何處無已是歸期歸未得
令人慚愧舊桃符

喜氣懽聲動四方今朝纔是得三陽臨風一盞屠蘇酒
坐看兒童次第嘗

拜舞歸時坐小齋好呼樽酒共梅開東君可是無私意
隨例公添一歲來

東隣照地鞍馬開西舍掀天鼓吹喧睡足黃紬無箇事
笑看春色淡忘言

青天白日放晴明海雨江風失晦冥看到陰消陽長處
蕤香清曉讀義經

昨夜奇寒未是奇縱寒能有幾多時庭梅已做春消息
開盡東南第一枝

出金陵二首

金陵連日醉吟閒一夕扁舟送客還愛煞石頭城上月

清光直照過龍灣

清樽倒盡別秦淮
月底孤蓬一半開
醉夢紛紜猶未覺
不知柔櫓過江來

和姜中丞韻二首

三載揚州鬢欲絲
揚州亦不似當時
瓊花落盡春風老
誰識前生杜牧之

儘渠官事日焚絲
不到虛齋靜坐時
賴有盆梅解相慰
伴人時復一中之

遊玄都宮乃馬丹陽遇王重陽故蹟宮有遇仙
亭亭前有丹陽歸山操石刻

讀罷玄都壁上文
碧桃影裏坐斜曛
舉杯欲問風仙子
只有西來一片雲

山色蒼蒼樹色青
一樽來飲遇仙亭
七絃聲斷歸山操
海濶天高何處聽

過吳江縣

夜泊吳江古岸傍
水寒煙澹月微茫
蓴鱸自是吾家物

一夜風吹入夢香

宿鶴坡寺

時隨湖水到金忠舟去
鶴坡水不通夜宿潘家長壽寺
蕭條更不似舟中

寺中端午二首

吳淞江畔上洋濱
轉眼忽忽節序新
欲問官情今樂否
觀音寺裏過殘賓

不見葵榴見草萊
一樽今日共誰開
家人遠解娛人意

綵索還隨角黍來

欽定四庫全書

西巖集卷十

元 張之翰 撰

七言絕句

聞鴈

燕中五見鴈南下今歲鴈來余始還堪笑餘生不如鴈
鴈歸常在一年間

春去秋來不自勞年年何用苦哀號人生老亦尋常事
太半相催是爾曹

羣影翩翩夜度淮
楚天風急楚雲開
不知老翅霜多少
為帶秋聲萬里來

病枕燈昏夢覺時
卧聞燕鴈向南飛
為余只好雲間住
野鶴成羣鷺鳥稀

還至上海二絕

過盡喜功生事徒
依然弊病在鄉都
海邊父老休哀懇
從此坍荒不要租

不田而米最為難
臺省官僚豈受譴
我有小詩雖鄙俚

也堪留與後來看

聽詔九首

萬人如堵塞春街清曉朝廷有詔來休道天人不相應
蠻煙瘴霧一時開

垢汙危疑正滿前從今一洗盡安然黃童白叟歡如海
聖壽宜過萬萬年

下詔推恩今始見上章拜號古難逢小臣華祝萬呼處
一炷心香徹九重

無人辯獄多冤滯有吏侵民盡動搖此事不知誰壞了
却勞明主布寬條

天意人心本不侔人心何用苦相讐一封丹詔從天下
喧破東南數百州

一詔纔頒萬國春好生惡殺見深仁叮嚀開諭惟新意
恐有從傍弄法人

幸災樂禍皆非意訐直沽名豈本心費盡精神成底事
九重天子聖恩深

一天和氣暖融融今日淮南酒盡空若使瓊花根尚在
也應開向此春風

主聖臣賢會合時九年一詔未為稀香煙約住雲間鶴
半日盤空不肯飛

牡丹圖二絕

洛陽風土最相宜花是人間第一枝今日江湖見顏色
恍然如到水南時

兩枝相映欲相扶面帶醺酣半未蘇傾國傾城誰似得

楊家姊妹夜遊圖

題李伯時九御圖

天生九逸古來難
曾逐文星自代還
費盡千金求駿骨
傷心却在畫圖間

題江梅帶月圖

誰識孤高老畫師
清江淺處幻橫枝
梢頭更著黃昏月
一樣西湖處士詩

題閑閑書太清大字後四絕

昔聞曾綴列僊班一去蓬萊更不還
海濶天高無覓處
空留鐵畫在人間

平昔文章亞韓柳祇今字畫敵顏蘇
九原已死高丞相
曾見先生此筆無

公於無競嘗斂衽我道元章堪抗衡
興定年中太清筆
至今英氣凜如生

字學如公得法稀書中扁榜更雄奇
鄉閭小子生何晚
不見當年下筆時

劉法師祈晴卷二絕

昔年曾作祈雨引今日又作祈晴詩
真宰茫茫無處問
變凶為稔只煩師

指揮神鬼法皆知驅使風雲術更奇
袖裏深藏掃晴手
人間未有不陰時

重奎閣

晚涼軒戶一時開四面溪山眼底來
欲識登臨高幾許
憑欄下視越王臺

宿柯亭詩

好山似恨客西行
便比朝來減舊青
我自笑余忙箇甚
滿船風雨宿柯亭

題若耶溪

李白詩中曾識面
少陵集裏舊知名
採蓮舟上人休訝
辦得青鞋便一行

謁禹廟

萬壑千巖費應酬
不逢佳處未能休
禹王廟上題詩了

纔是東南第一遊

賦趙西湖宣慰紅梅

小園處處可藏春
一樹紅梅最可人
應解詩人有新句
樽前也作醉精神

扶疎脩竹遙相映
裊娜垂楊未敢侵
一片綵雲飛不去
東風吹影落池心

方虛谷以四詩見寄依韻奉答

已是人間七十翁
如翁清健幾人同
白頭風味猶依舊

半在吟中半醉中

老把行藏不問天作詩多似作官年
昨朝有句清如許
來自西湖月影邊

乾坤萬里一詩翁蹤跡沙鷗畧與同
天上鵷鷺留不住
被風吹入鶴羣中

一片黃雲熟稻天幾年都不似今年
安排舟楫邀公去
共醉秋香桂樹邊

高彥敬郎中以山中吟見寄故此奉答

新詩來自碧山間紙上雲煙尚未乾我欲殷勤和高韻
心田廢井不生澗

扶筇屢上兩高峯按轡曾過九里松傳語山中老猿鶴
而今不似舊形容

日日探竒不厭竒每尋蘭若作幽棲風篁嶺上龍泓壁
曾拂塵埃見舊題

舍南舍北種田郎唱得田歌曲曲長莫學傍村遊俠輩
茜紅抹額臂擎鷓鴣

龍井十絕

石泉深處卧神龍，獨抱風雲變化功。
愛惜天瓢不輕建，且教鱖鱣舞泥中。

元祐諸賢幾往還，能令此井重荒山。
一篇秦記清如水，合在蘇家伯仲間。

人傳井有老蜿蜒，不出清泠幾百年。
暮鼓晨鐘香火底，祇今應也學參禪。

湖自瀾漫井自深，本來喧寂不相侵。
情知時世新妝面，

難似山林古隱心

一泓冷貯碧琉璃
龍去龍來總不知
休道終年只如此
疾雷須有破山時

來訪當年二老亭
晚風吹我嶺頭行
龍公似送驚人句
先作半山雷雨聲

石壁寒泉玉不如
不須苦問舊時魚
一杯且洗雙眸了
留向殘年夜看書

洗鉢僧歸樹已蒼
煉丹人去草猶香
呼餅滿汲冷泉水

要與三賢奠一觴

神物豈隨潮出沒靈泉不作世清渾
老僧果識探奇客
一度遊山一叩門

不見風流老辯才風篁嶺上逕生苔
白雲有意留余住
鎖定山門不肯開

過水口

日暮水風吹鬢毛扁舟上瀨不知勞
溪神似是來相迓
添得濤頭一丈高

訪方干故居三首

唐室亡來宋又空
故居猶在白雲中
遙知鸞鶴追隨處
不是嚴公即范公

一點高情寄白雲
千年舊隱隔紅塵
先生未是忘榮利
留着科名與後人

讀盡羣書不解經
世間無祇以詩稱
若非文正從公論
近世誰教配子陵

孝友峯為孫元端作三絕

為喜君家孝友峯物情人意得相通惜哉不到坡仙手
空費沉香作賦功

老筆文安是廣平

宋弘道先生作記

小峯宜與記崢嶸一門和

氣春風底莫遣巉然浪得名

陷父嘗教歸不義訟兄直至死無辜腰金莫傍孫門道
恐見茲峯愧殺渠

題白雲亭

下馬扶筇上石梯一亭高與白雲齊老僧旋掃青苔壁

准備新詩醉後題

露香亭詩

落盡千紅萬紫時
秋香都在傲霜枝
一杯滿吸西風了
細嚼韓公晚節詩

途中書所見

此去天台只數程
海天秋氣共崢嶸
人家新住東船子
何處歡然不太平

題沸井浜湧泉二絕

伏流海畔與江邊湧出珠璣箇箇圓
兩過石橋無好句恨余才思不如泉

夕陽來讀瑞安碑沸井源泉恰得知
何似珍珠亭上看與君同醉濟南時

闕題

石礙奔湍觸兩崖萬雷湧出地中來
舟人笑我迂疎甚猶向雨中覓硯材

過蘆溪

弓刀雜選小行營路入蘆溪作陣行不信西南諸將校
相逢便道是書生

泉州路教授陳德恭以詩求書梅所二大字二
首

滿苑寒梅次第芳花間便是讀書堂不知端的春多少
一陣風吹字亦香

誠齋曾作竹所記西巖今書梅所名惡札雄文莫分別
到頭總是一般清

三月二十八日雨中書於幕壁二絕

履聲寂寂鳥關關
公廨無私盡日間
底事朝來敗人意
綠槐和雨暗南山

一雨中庭長綠苔
幕中無事亦悠哉
倚窗哦盡新詩句
門外幽禽喚不來

宿大安驛

亂山深處絕人聲
祇有蕭然一驛亭
曉夢松窗忽驚覺
竹筒寒溜正泠泠

自南劍登舟四首

百里前途一瞬中
紙船全仗鐵篙工
書生可是輕風浪
卧聽瀟瀟雨打篷

一葉扁舟壓浪過
被風掀舞疾如梭
昂頭却問山行險
抵得摩天第幾坡

雲間細路萬重山
山下奔流百折川
閩叟且休誇此險
天兵已到海南邊

柁尾儘隨人曲直
船頭常與浪低昂
爭如十里黃臺路

一片荷花醉夢香

題何侍御雪霽江行圖

萬斛船過萬疊山
清江兩岸雪漫漫
題詩憶得經行處
絕似青居直下看

北風吹雪滿江濱
飽載歸裝旋問津
帆影不搖船壓水
細看未必是南人

江頭日日滿氛埃
萬里青天一旦開
八道澄清有奇策
發源應自此圖來

柳塘鷗鷺圖

林影波光半有無
水禽沙鳥共舒徐
一官奔走臨安陌
應笑詩人未可呼

題溪山雅集圖

山掩茅亭水繞村
是中別是一乾坤
不知痛飲狂歌際
曾有追胥夜打門

屋下清溪屋上山
市朝誰不慕高閒
可憐題罷新詩句
依舊車塵馬足間

題菊鶉圖

一片野風吹菊枝
菊枝香裏淡忘機
畫梁燕子休相笑
未肯傍人門戶飛

李伯時猴驚馬圖

百戰歸來海宇平
晝長天厰寂無聲
獼猴伎倆渾多少
霧鬣風髯不用驚

李萬戶劍

夜氣曾衝北斗殷
土花不蝕玉龍寒
山西若不逢真賞

直與鉞刀一例看

書鎮人任子齋九十詩卷後

華髮飄蕭一地僊十年前是遇文年東湖煙景西溪酒
晚却非熊亦自賢

再見昇平兩鬢霜老人星獨照滹陽從今門巷休低小
恐改他年上壽坊

三復諸君九十詩信如公德幾人齊忽忽莫訝無多語
留待期頤卷後題

題襲貞詩卷二首

婦道無如婦節完以貞相繼老尤難若為寫作圖千億
送與家家戶戶看

世變風移自誓稀夫喪未滿已他之雲中姑婦賢如此
撥冗題詩更敢辭

題趙大年小景

淡墨都來片許過山林幽景足森羅因君悟得題詩意
句到通神不在多

題楊西庵集二首

世上已傳新樂府
庵中猶有舊詩文
一從天奪春風筆
閑煞青山與白雲

別却蓬瀛幾十秋
人間夢斷恰回舟
石樓詩句今何似
名與清伊日夜流

題鳳頭驄圖

驄馬生成號鳳頭
于闐遠遠入中州
玉花雖好休相比
號國夫人曾夜遊

留犢圖二絕

來時應似去時清
父老攀轅不放行
留犢與渠君自了
車中黃特若為情

牛駕單車出壽春
蕭蕭行李不勝貧
三年一犢猶留却
着甚朝京見貴人

楊妃上馬圖

武媚制書全在已
韋娘墨勅只由他
一般都是唐家禍
不是渠偏畫樣多

一讀新唐數紀餘恰逢天寶陷天都凝然未了傷心事
又見楊妃上馬圖

鵲華烟雨圖

壁立長空劒倚雲小孤直與大孤隣幾時煙雨齊州道
遙認雙溪是故人

松橋晚渡圖

幾家籬落枕滄灣落日平林紫翠間我是松橋橋上客
不驅驢去且看山

山下清溪山上松此間只合著詩翁有心便策孤筇去
一笑相看是畫中

秋江晚渡圖

青山隱隱水悠悠野樹荒烟慘淡秋不著秋江江上月
却從何處認歸舟

烈女圖

古人賢婦豈易見一旦俄歸眼底來休道虎頭能畫耳
筆頭元有史臣才

雪山捕獵圖

水滿深溪雪滿岡獵人休笑捕魚郎
栗膚龜手寒如許總為區區口腹忙

李伯時八駿圖

霧鬣風髯各不同為誰着意苦形容
駑駘塞破奚官眼老死何曾識八龍

龔翠巖以畫馬見寄且題絕句於後因次韻奉
謝二絕

蕭蕭片影渡河關千里燕齊一日還
留得追風四蹄在不妨且伴老奚閑

仗下元來有所關一鳴見斥却空還
祇今駑駿誰分別休夢天家十二閑

題董敬叔樗亭詩

莊子書中稱擁腫香山詩裏說天
年前賢寓意固自可渠欲學之吾
未然

不為舟楫不梁棟可免青黃斤斧
災未信將來只如此

一枝先傍玉堂栽

題憲宗墨竹二絕

前星光彩照乾坤
萬里江河正并吞
六十年來歸變滅
老僧猶愛墨龍孫

曾讀中州聖製詩
只餘一首五言奇
筆頭清氣用不盡
散作墨君千萬枝

李仲賓著色竹

此君宜瘦不宜肥
第一功夫在活枝
欲識天然真面目

息齋筆底正猗猗

題東坡瓊華帖

世隘何能著此僊
惠州更向海南遷
流傳一幅瓊華帖
恐是當年未貶前

題東坡醉帖二絕

余在翰林行臺御史完顏正父嘗求作夢會
圖序蓋德嘗夢坡有十詞為渠壽且約以黃
衣時相見至元壬申果天下僧易緇為黃又

得坡像而奉事之德一百一十二歲示寂皆
符其言今澱山一老又出示坡翁醉帖請題
故重為拈出

祇為篇章散不收當時怨謗已山丘醉中又作龍蛇筆
不到崖州未肯休

德公曾有衣黃詞一老今求醉帖詩我亦從來愛坡者
夢中說夢更何疑

墨梅

梅花初破雪花飛好在橫斜第一枝長記西湖湖上路
一鉤新月獨來時

題趙信庵墨梅二首

秋壑來時已乞歸信翁心事幾人知白頭無用和羹手
猶作橫斜一兩枝

此老胸中兵百萬不知何地著餘春醉毫寫出孤山影
宣是花光輩行人

武后聽諫圖

鸚鵡夢邊心未已
牝鷄聲裏涕猶潛
從容一語無多字
奪得唐家社稷還

理宗所題黃白二色菊扇頭

扇頭題罷菊花詩
一夕秋風萬事非
休道丹青不為識
白衣先犯柘黃衣

好在深宮第一枝
半黃半白總相宜
北風吹破輕羅面
狼藉秋風却屬誰

題張學錄蘭軒二絕

吾宗元數一蘭泉
恰到蘭軒第二傳
却笑西巖老逋客
為君三嗅晚風前

擬學靈均詠九章
幽花潛德共芬芳
小軒端的春多少
題罷新詩字亦香

題季山所藏西溪帖二絕

丈有波瀾字有源
如公竟老一臺官
祇今人物誰堪比
空抱三書忍淚看

此老平生樂薦賢
春風留在五雲牋
縱橫健筆今何處

悵望西溪起暮烟

右司正之家渭川千畝圖

落日蒼煙渭水寒
秋風吹動萬琅玕
可憐不入時人眼
短白長紅一例看

秋山煙寺圖

霜後千巖錦不如
孤煙起處是浮圖
若為借得丹青筆
添入能詩趙蹇驢

題西湖歸隱卷

不是杭州與潁州買湖直在菊潭頭軟紅塵裏題詩處
媿煞滄波一葉舟

題秋菊圖

萬蘂千葩委綠苔東籬獨自傲霜開幽香不逐秋風老
又落春塘筆底來

題鴈鷺圖

鴈舊成行鷺綴班十年一夢大槐安葦花蕭瑟汀洲冷
惆悵江南客裏看

迎薰嫋嫋小雙鬟旋割冰瓜與捧盤團扇美人梳洗罷
瓠犀先覺水精寒

周文矩剔耳圖

能淨能清貴有根不聾不瞶要多聞誰將此箇輕挑法
傳語當朝鄭相君

明皇吹簫圖

祇見歡娛不見哀龍樓翻作鳳凰臺枕中一曲聲多少
能引漁陽萬馬來

赤壁圖

一時謫向黃州去四海傳為赤壁圖爭得謝墩方罷相
有人曾畫半山無

戰艦煙消幾百年江山風月屬坡仙玉堂果有容公處
二賦何由世上傳

題秋風激浪圖二絕

東坡曾作灝瀕賦遺山亦有集津詞茲圖今日忽當眼
始信二老揮毫時

西風峽口響砮雷萬頃逡巡納一杯不着孤山相齟齬
狂瀾橫放幾時迴

題淵明圖

盡道將歸竟不歸軟紅塵裏日爭馳平生幾詠淵明畫
似向葵軒無愧辭

許由洗耳圖

潁水東流日夜聽六根纔得一根清數千年後猶圖畫
誰與先生洗此名

山村風雨圖

從得山村風雨圖
牀頭十日未曾舒
要題一絕猶無暇
更敢忽忙苦笑渠

山遠村深賦稅稀
人家蠶老麥黃時
不因風雨山村筆
誰識無聲七月詩

輓硯司業三首

白頭若若復累累
滿眼金珠病亦稀
國子先生貧到骨
一丘黃壤却先歸

蕭蕭宰樹已秋聲
恨滿東垣尚未平
休道不蒙稽古力
紫袍中有幾書生

春風不掃鬢邊霜
黃卷青燈夢一場
國學傳衣高第在
我知名德未曾亡

題四聖圖

畫卦重爻明至理
繇辭翼辯具全功
誰知萬古天心學
都在丹青一幅中


題風雨回舟圖

一線微官役半生風波千丈畏途行披圖欲說回舟好
却恐旁人笑不情

鄉中九日雨二絕

情鍾我輩大蘇詞與客攜壺小杜詩今日興闌都忘却
滿簾風雨閉門時

年年九日憶家鄉及到鄉中却雨妨自笑人生強分別
菊枝何處不花香



欽定四庫全書

集部

西巖集卷十一至
三

詳校官中書臣李彤

侍讀臣孫球覆勘

膳錄監生臣汪祿

膳錄監生臣李光緒

膳錄監生臣陳祁

欽定四庫全書

西巖集卷十一

元 張之翰 撰

詞

萬年春

一夜東風滿城和氣先吹徹問春來也幾點梅花雪
心事蹉跎羞對東君說長為客去年時節走馬銅臺陌

前調

立春日內前對雪

斷送餘寒舜韶聲裏東風度九重金戶催進宜春句

道似春來又候春將去朝天處柳花無數飛滿宮前路

南鄉子

元夜嘉陵江觀放燈後作

燈夕在江陰綠酒紅螺不厭深醉眼清江江上看更沉
放盡春風萬炬金流到碧波心小竹連舟儘自禁此
夜此情誰會得如今都付青崖馬上吟

前調

十六夜侍燈不見作

簾幙捲春陰坐守江燈正夜深兩岸人家樓閣暗消沉
笑道良宵直萬金負煞隔年心多病情懷難更禁腸

斷一江春水碧從今著甚垂鞭帶月吟

前調

謝王秋巖元帥重陽送餽果

霜冷鴈來天
覽社重陽又一年
多病文園扶未起
攣拳節物關心正
自憐
照眼菊花鮮
盤果旗餽簇滿前
知是秋巖人
送似欣然便帶新詞到枕邊

前調

和秋巖重陽

紅樹掛斜陽
秋滿淮南覽社鄉
古往今來多少恨
縈腸
寫作詩詞四五行
酒熟勝鷺黃
直待西風醉一場
說

與多情籬畔菊留芳
青女能慳幾夜霜

江城子

瓶梅

隔簾風動玉娉婷
見來曾眼偏明
手揀芳枝自挿古銅
瓶
六載烏臺飢欲倒
猶為汝未忘情
幽姿芳意正盈
盈
可憐生欲卿卿更取
青松為友竹為朋
今夜黃昏新
月底還却怕太孤清

前調

游孫園

丹青畫出小亭臺
巧安排
絕塵埃
二十年間成此亦奇

哉借問主人凡幾醉直到老不曾來
來鶯去燕莫相猜
猜水平階逕生苔倚遍欄干堪愛也
堪哀柳外春風都
不管依舊遺百花開

前調

寄盧副使處道

去年雪裏送君時馬遲遲思依依及至金陵還却值君
歸獨抱此情誰與語空三復草堂詩
年來雙鬢欲成絲
絲惜睽離喜追隨四海而今渾有幾
相知上到廬山高
絕處曾為我一支願

前調

博文歸意有未盡又以江城子為贈兼簡吳中諸士夫

閒中自合故人疎五湖居二年餘鄭重君家遠寄數封
書昨日相逢還憶否只記得舊清癯留君無計住須
臾便歸吳重躊躇曾掛風帆三度過姑蘓為問臺前雙
白鷺煙景似向來無

前調

和韻姜中丞兼寄趙侍御明叔

黃金臺下識行驂著朝衫宦情酣不料維揚留住老曹
參舊說長江千里外今只在小樓南金焦倒影碧潭

潭送飛嵐要竒探看取樽前醉袖旋分柑一曲高歌春
未老官裏事且休談

前調

道途急急莫留驂敝塵衫困如酣二載齊州剛喚作髯
參長記秋風吹別酒君向北我來南

前歲與明叔別
於長清門外

來時霜未落寒潭正山嵐便平探嘗遍閩中新荔不論
柑留著歸囊三百首都直待見君談

菩薩蠻

暮春即事

梁間雙燕呢喃語想曾知得春歸處問著不磨人芹泥
香正勻 翠陰庭院悄手摘青梅小天氣恰清和越衫
猶薄羅

謁金門

十六夜月

夜來三五月初圓歌吹競喧闌二八嬋娟更好便無人
對樽前 可憐浮世只爭一夕如許心偏玉色何嘗喜
愠年年歲歲依然

臨江僊

須信人生皆有命只途造物由他年光時事苦相磨一
從居冗劇兩度見新禾枉著黃塵三萬丈等閒換却
滄波別來誰與曬漁蓑不知同釣者時復謂余何

太常引

寄鄉中諸友

一書除得海邊頭悵無地著羈愁何處望吾州謾斜日
高城倚樓東湖湖上錦雲十里政好藕花秋日日醉
扁舟也曾念山東舊遊

木蘭花慢

聽姜惠甫摘阮

羨黃臺公子能辦此淡中清看壁月當胸松風應手一
洗秦箏都來四條絃上有幾家樂府幾般聲秋水孤鳴
老鴈春風百轉嬌鶯嫩涼窻戶酒初醒特地為渠聽
寫江南江北無窮意思字字分明悠揚博山煙底把滿
懷幽恨一時平長記曲終時候錢塘暮雨潮生

前調

同濟南府學諸公泛大明湖

喚扁舟載酒直轉過水門東正十里平湖煙光淡淡雨
氣濛濛迴頭二三名老望衣冠如在畫圖中但得城頭

晚翠何須席上春紅 清樽旋拆白泥封呼作白頭翁
要與汝忘情高歌一曲痛飲千鍾夕陽醉歸扶路儘從
渠拍手笑兒童官事無窮未了人生適意難逢

前調

自中年以去覺歲月疾如流漸鬢影蕭蕭人情草草世
事悠悠言歸幾曾歸向高沙又度一年秋未要青雲著
脚且簪黃菊盈頭 五湖煙月一扁舟髣髴鳳麟洲但
乘興而吟吟而須醉醉則纔休余生本來踈嬾更忘機

鷗鳥苦相留不是舊游情厚夢魂不到南州

前調

送趙治中

見平蠻詩卷都道是膽色驅聽細話平生辭雖慷慨氣
却舒徐春風忽然吹興正瓊花時節別江都恨煞樓頭
雙鶴不能留住須臾輕煙細雨濕平蕪一舸下東吳
想拄杖尋梅敲門看竹多在西湖行裝不須多辦把錦
囊分付小奚奴怕過孤山山下一杯先酹林逋

踏莎行

和張夢符

踏月才歸戴星還起客懷苦似當途李舊時曾釣細鱗
魚新醅旋撥浮香蟻此興茫然於今已矣朝朝暮暮
奔忙裡淮春樓下有吾舟掛帆又過桃花水

蝶戀花

往歲相從今已許今歲逢君愈見真誠處除却交情無
別語匆匆忍上歸舟去醉裏猶歌長短句醒後軒窗
歷歷餘音度消盡爐熏三兩炷片帆風送寒江暮

唐多令

和劉改之

何處是滄洲寒波不盡流
恰登舟便過城樓一片錦雲
三萬頃常記得藕花秋
漁父雪蒙頭此情知道不說
生來不識閒愁青笠綠蓑煙雨裏
吾與汝可同游

前調懷高沙

往事水東流槐根春夢休
被長淮隔斷中州三十六湖
湖上佳又過却一年秋
佳處總堪遊同盟只數鷗把
功名且付扁舟天上故人知己者
休笑我太遲留

前調

靜有讀書緣貧無使鬼錢儘虛齋盡日蕭然鯨海波濤
三萬丈元不到此山前夢蝶正翩翩香匝飄篆煙更
何心敢怨青天若論閒居多少興風與月浩無邊

前調

不是強辭榮風波實可驚算平生耐久交情走遍天涯
依舊好都不似一燈青世路自歎傾湖天方晦明也
休將文字爭鳴一曲漁歌無別調煙雨外兩三聲

前調

怨思入清笳斜陽鳴亂鴉正開樽細酌流霞北里南莊
今歲熟全不覺米難賒筆硯淡生涯胸中氣自華看
凋零野草閒花事不相關收脚坐吾便是貴人家

前調

冠上滿塵埃未彈君莫猜有諸公暮省朝臺醉後狂歌
歌後醉能辨此竭吾才可以慰幽懷此時何有哉道
寒梅又欲新開碧玉枝頭今幾蕾須一一寄書來

感皇恩

庚寅立春

日日苦思春春來何處積雪層冰正無路春風吹面萬
里故人相遇隔年離別恨從頭訴鬢髮清霜形容槁
樹漸覺人生不如故唯春最好底用一年一度有心當
不放春歸去

前調

立春日次趙疎堂大中韻

何處鳥飛來一聲清曉報我東君已來了青陽歌罷又
是一番春早冷官庭戶裏纔知道千里歸心六年愁
抱不覺朱顏鏡中老故園茅屋依舊白雲深繞有誰曾

占却西巖好

婆羅門引

賦趙相宅紅梨花

冰姿玉骨東風著意換天真軟紅妝束全新好在調脂
纖手滿臉試輕勻為洗妝來晚便帶微嗔香肌麝熏
直羞煞海棠春不殢數卮芳酒誰慰黃昏祗愁睡醒悄
不見惜花賢主人枝上雨都是啼痕

前調

病中對菊

當軒有菊幾年不共結清歡偶然乘興南還却念都城

手種誰與護霜寒正閏餘秋晚曾未開殘
官游最難
算長在別離間不是未逢蓓蕾早已闌珊今年好處恰
花近重陽慰病顏微雨後一笑相看

前調

自公去後曲欄荒逕老孤芳公來花亦生光一陣朝來
細雨開作十分黃甚厭厭抱疾却悞重陽
曾吟短章
也曾見醉銜觴但得翛然相慰歌枕何妨燕山已遠且
莫問園亭此際霜人意足處處花香

前調

辛卯中秋望月

宦游南北月明何處不相隨
十年九賦新詞今夜清光
如許無以侑金卮想叨居此職著甚推辭
臨風再思是有句欲來時
除却廣寒人見塵世誰知
天香一陣恰飄動婆娑桂樹枝
秋影裏醉寫烏絲

滿江紅

送劉叔謙御史

滿酌離盃留不住
繡衣行客還正是登車攬轡慨然時
節白簡纔辭烏府去
紅塵旋被青山隔
看弓刀千騎擁

秋風塗陽陌 自不負心如鐵著甚語堪為別道太柔
則廢太剛則折任外豈非經濟手得中便是澄清策待
功成隨詔早歸來從頭說

前調 益都時習閣睡起

六月青州何處是此身堪著都不似素王宮裏倚雲高
閣萬里風來無隔處睡餘常覺衣裳薄把暑天如水晝
如年消磨却 心地上何軒豁眼界外猶寥廓被野煙
高鳥勸余清酌一片青山知客意冷光堆滿欄杆角恨

偃然不肯入城來難相約

前調

登汪帥展江樓

山壓長江流不盡滔滔深碧形勝地以江為塹以山為
壁兵府舊分城上下人家新住洲南北說當年天馬入
川時皆傳檄市不易居如昔龍已去攀何及問人人
能道聖朝恩德最爾南州成底事宛然上將勞吾敵看
紅塵一騎捷書來來春必

前調

眼底交游十載被江湖相隔嘗記得道菴人靜縱談朝
夕紙上雲煙隨散落毫端風雨何休息甚這回相見便
蒼顏都非昔 中年別真堪惜生辰會誰曾必看西風
搖動可人詞筆天上桂華香近也此盃再要和君吸恨
抗塵走俗太忙生無閒日

前調 寄張藍山

古木寒藤高岸底蕭然舟宿一夜雨朔風吹浪浪高於
屋夢覺蓬窓無共語此時正自憐幽獨道藍山老子送

詩來挑燈讀 辭與理俱能足從別後情尤篤想鬢毛
如鶴目睛如鶻四海如公知己少有心日日相追逐恨
濯纓亭遠水縈紆山重複

念奴嬌

九日同府學諸君飲王氏園

二年重九莫都向江北江南虛度鴻鴈來時秋最好底
用千愁萬緒九朵青山幾尖白塔何限登臨處今朝乘
興也和詩客凝竚 正是雨洗芙蓉風翻墊菊霜染江
楓樹一片天開圖畫裏留著天然佳句收拾方來安排

未定試問雲間路三盃繞盡筆頭疑有神助

欽定四庫全書

卷十一

欽定四庫全書

西巖集卷十二

元 張之翰 撰

詞

酹江月

人間良夜是年年八月中秋時節萬古青天當此際正
要十分澄澈何處浮雲微茫黯淡便把清光隔凭欄三
嘆恨無長笛吹裂 坐看蠟燭爭輝青燈吐焰負煞尊
前客待到譙樓初鼓後不覺衣裳涼徹試草新詞憑風

吹去教向嫦娥說須臾知道廣寒推出明月

前調

賦濟南風景和東坡韻

南山北濟莫難盡十二全齊風物平地華峯天一柱鵲
倚巖巖青壁金線橫波真珠出水趵突噴寒雪無窮瀟
灑品題宜有才傑 遙憶工部來時謫仙遊處興自雲
間發翠琰高名千古在不逐兵塵磨滅細嚼遺篇高歌
雅句風動蕭蕭髮英靈何許畫船獨醉涼月

水龍吟

張大經寓第牡丹

舊時來往燕都為花常向花前醉十年一夢鬢絲如許
尚餘情味曾見君家後園深處滿栽姚魏恨忽忽過了
尋芳時候又早是春歸際 只想十分憔悴說兩株猶
未曲欄干凭朝酣不語為誰凝思擬和金牋清平妙曲
與渠相慰怕今宵便有無情風雨作遮藏計

前調

留別

別來幾度秋風數千里外還重遇虛齋晝掩厭厭多病
賴君看護鵝鴨比鄰魚鰕市并擬留余住被催人天上

除書一紙又催過江南去一夜扁舟風雨問誰知此時
情緒明朝回首荒城古塔離亭高樹點檢囊中錦牋半
是秋巖佳句待從今且把新詞閣起共何人賦

前調

伯庸近以樂府賀余新居未及裁答伯庸復有遼陽省掾之行相愛之情不能無語

因用前韻奉餞且為凱還日把杯一笑也

去年鞍馬東來為余嘗說遼陽好而今風物戰塵低暗
陣雲高繞幕府掄材縱橫健筆似君元少看燈前草就
捷書一紙飛奏入龍樓曉遙望蓬萊曉靄問何如日

邊瓊島鴈來時候霜風淒緊應思歸早萬里西州雙親
雖健衆雛猶小怕區區但了平生心事約山間老

前調 送程達之萬戶還宣城

我從年少知君胃中氣與秋天杳天戈南下幾番屯戍
幾番征討筆硯從戎詩書為將世間元少想何如靜處
求田問舍便辭得功名了 兵府水圍山繞儘雄深不
妨吟豪秋高時候羽書催急渡江須早號令重明角聲
風冷劍華霜曉要從今做取十分事業恰歸來好

前調 寄郭安道御史

一杯未盡分攜忽忽爭似休相遇方余病起不禁同醉
只須將護萬里淮天數行征雁雨晴風住趁瓜洲古渡
東來潮水便高卧孤帆去卧聽江聲如雨漸消磨滿
懷愁緒丹青寫出金山烟塔焦山霜樹如此江山發揮
正要雄章奇句仗何人喚取青驄御史看揮毫賦

前調

秋巖既別是日晚又訪余
龍城外復以前韻寄謝

中年怕見離筵惡懷易感歡難遇愁城百丈舊時全仰

酒兵遮護不飲而今如何禁得欲行還住與元戎已別
弓刀小隊能為我年來年去 一陣黃昏細雨正心頭
萬絲千緒幾家燈火烟迷湖水風號堤樹咫尺重闌故
人千里可能無句聽譙樓更鼓寒聲歷歷倚蓬窓賦

沁園春 寄劉光奇都事

有手擎雲有背摩空相期昔年記南方初下送君硬語
東曹未滿寄我奇篇二十年間數千里外底事曾無人
所憐青青鬢但一迴相見一度蒼然 此心寧逐時遷

且同醉金波藥玉船要詩之悟處深如學佛詞之妙處
絕似談仙匹馬江都片帆甌社又別西風落照邊沉吟
久寫離情不盡雁字聯翩

前調 送劉牧之同知歸江南

昨日送春今日送君難禁別離正桃花水滿遠歸江浙
揀花風起輕出京師早把功名置之身外世上何愁可
皺眉從今去但求田問舍此意誰知 當年交友全稀
試屈指諸君更有誰說郭髯磊落猶居判府許翁清健

已謝簽司回首南關悵然如夢幾度憑欄費所思煩傳
語甚孤懷索莫不寄新詩

前調

送趙彥伯御史

君按西秦我走東秦一樽共開恨忽忽行色無多歎曲
區區別語未易安排百二關河三千道路前歲如今曾
往廻但休問過潼關北去都是詩材 公餘應見青崖
怕念我茲游無好懷也知巧宦常居要地其如公論不
用非材北渚光中華峰影裏放得婆婆亦快哉三年裏

儘平分烟景抖擻塵埃

前調

至元戊子冬國子司業李君兩山以春官小宗伯奉命使交趾故作此以壯其行

國子先生博帶峨冠胡為此行正蠻烟瘴霧遠趨象郡
祥雲瑞靄近別龍庭率土之濱際天所覆何處而今不
太平安南者彼地方多少敢抗吾衡一封天詔丁寧
要老子胷中百萬兵看健如馬援精神矍鑠辨如陸賈
談舌縱橫奉職稱藩功成事定更放文星分外明歸來
儘不妨詩筆顛倒南溟

前調

不肖掾內臺時西溪王公為侍御史遵誨

後柳溪

兄為監察御史恕齋霍兄為前臺掾其

幕皆平昔所敬慕者至元甲申春不肖以南

臺裏行求去退居高沙又二年冬十月迫以

北歸由維揚至金陵別行臺諸公適西溪柳

溪拜中丞遵誨擢侍御願軒恕齋授治書越

二十有五會飲願軒寓第時風雨間作以

助清興西溪草書風雨會飲之句柳溪復出

燕脂井欄之製遵誨恕齋道古今之事願軒

歌樂府之章某雖不才亦嘗浮鍾舉白鼓譟

其傍一談一笑不覺竟醉竊嘗謂人生同僚

為難同僚相知為難相知久敬為尤難今歡

會若此可謂一臺盛事因作沁園春歌之

四海交親別離儘多會合最難見西溪老子情懷樂易

柳溪公子風度高閒鐵石心腸風霜面目更着中朝霍
與韓知音者有頤軒侍御收拾清歡不才自顧何顏
也置在諸公酬酢間似蕪葭依倚瓊林玉樹蕭蒿隱映
春蕙秋蘭南北烏臺當時年少雙鬢而今半欲斑明朝
去向德星多處遙望鍾山

前調

謝王巨川侍郎以澹游所書扇見惠

四海黃花文采風流於今尚存看澹翁詩句太羹玄酒
名家書法流水行雲洒上青山楓林丹葉書破晴空月

一輪余嘗見把君髯搖動特地精神
謝君雅意殷勤
便付與同僚更可人愛紫筠直節柄纔到手輕羅縞面
影不離身縱使當年石城風起不怕庾公千丈塵難忘
處正午天如火涼滿衣巾

前調

送鶴寄可與郎中

鶴汝前來與余相從近乎一年每座隅舉目看揮大字
窓前側耳聽誦佳篇月白風清天高露下不肯飛騰亦
可憐鷄羣裏見雪衣丹頂空自昂然
星郎明日南遷

待送上秋風千里船莫因其所好乘軒受祿啟其所欲
學道昇仙渠是而今經綸大手早取徵書下日邊長鳴
罷似知余雅意兩翅翩翩

前調

鶴答和寄可與郎中

昔自九臯慕翁而來何期歲年記初為翁客獻千百壽
後為翁友得兩三篇夜夜飛鳴朝朝起舞不是賞音誰
見憐追隨久儘人多怨者我獨欣然翁今猶未高遷
便離却交游載月船想西巖夢我大綱坡老繡江畜我

小樣逋仙二老風流他時相約須到西湖煙水邊孤山路看雲間來迓秋影翩翩

前調

用送鶴樂府韻寄可與亦督和之

自別君來日如三秋夜如一年想小金山下笙歌促席橫江樓上樂府連篇世故相驅歡情未已遽爾歸來祇自憐空回首望南州城郭烟水茫然思君便欲移遷更共泛西湖湖上船但杯中有酒何分賢聖心頭無事便是神仙鶴去多時甚無一語迴到高沙煙雨邊吾知

矣正挑燈和韻筆勢翩翩

前調

遊孤山寺寄姜中丞

若論西湖潁川汝陰俱難似之正湧金門外天開罨畫
錢塘岸側城展玻璃曾借扁舟晚涼一棹先向孤山近
處嬉回頭望是吳山樓閣煙靄參差淡粧濃抹相宜道
不獨晴奇雨亦奇訪歐公遺像仍存古井逋仙舊隱猶
有荒祠泉若通靈梅如解語應也怪公題詠遲從今後
怕公餘無事準備新詩

摸魚子

辛卯清明日嘗以金縷曲侑觴今年獨無可乎因作摸魚子一闕以寄意

問誰知此時情緒忽忽寒食相遇東風可是無閒暇開
盡白紅千樹春幾許還又怕轉頭風雨留難住浮生浪
苦且携酒重尋去年花下歌我舊金縷樽前友惟有
青山如故至今面目無妬冷光晴色三千丈斜照夕陽
窻戶堪訝處被幾葉風帆催上江南路無人自語想五
載居京一朝得郡却甚也能去

金縷曲

送可與卽用其韻

樂府寧無路彼區區斜門枉運少人知處從得君詞驚
且訝醉裏坡仙曾遇是夢裏稼翁教汝玉尺金刀俱在
手把天機雲錦裁成句纔落紙便傳去 筆頭不用空
豪怒也何須梨花縞月海棠紅雨一曲離歌悲壯處不
覺人間三鼓有幽壑潛蛟起舞休道此情天不管怕餘
音嫋嫋無人許風送入渡江櫓

前調

送茅山倪道人並寄山中諸道友

回首茅山路渺滔滔長江南畔碧山無數曾被天風吹

醉夢直到華陽深處也親見鸞駢鶴馭覺後分明空記
省悵丹坡蹤跡今何許還又被世緣誤 幾番自詠山
中句覺霏霏雲煙秀色去來眉宇曾共三峯重有約已
辨清秋杖屨看能與羣仙相遇君去丁寧無別語怕山
靈怪我來何暮纔有伴便同去

前調 送德昌

走遍江南路看天公何時還我故山深處君處錢塘余
甓社千里不期而遇更分甚主賓吾汝一片湖光濃似

酒待發揮我輩清新句幾魚鳥不驚去 醉中不怕波
神怒儘人間紛紛輕薄翻雲覆雨燈火歸來纔半醒
月夜譙樓初鼓正老鶴迎門飛舞此樂人生能有幾悵
後期好在知何許明日又送柔櫓

前調

中秋夜不寐枕上作以自遣

未過松江去被高沙同盟鷗鷺暫時留住曾共中秋心
期定再上江船容與待滿載淮歌楚舞豈料桂花香霧
底正河魚作祟深相苦樽有酒不忺舉 夢中似聽鶯

娥語道人生百年纔半未為衰暮江北江南行欲遍幾
見月明三五嘗爛賞通宵達曙可是今年情思嬾便臨
風悞却清新句聊援筆為渠賦

前調

雙陸

此博誰名汝想當年波羅塞戲涅槃經語天竺傳來雙
采好么六四三二五要隨喝隨呼隨數從得三郎緋衣
了再曾逢潘彥知音侶同入海亦良苦雄拏豪攫爭
鳴杵正闌河疎星殘月幾聲秋雨却是驅馳元黃馬脚

底踏燕蹴楚甚一礪一梁能阻翻覆輸贏須臾耳算人間萬事都如許且一笑看君賭

前調 乙未清明

風雨驚春暮恨天涯留春未辦却留余住時序忽忽催
老大又早飛花落絮莫禁得清明幾度試倚危欄西北
望但接天煙水無重數空目斷故山路 先塋松栢誰
看護想東風杯盤蕭索饑鳥啼樹便做松江都變酒醉
裏眉頭休聚向醒後安排何處萬里南來綠底事也何

須杜宇聲聲訴千百計不如去

